

**Parlimen: Kerajaan Cadang Perluas Program Guna Bahan Api B5 Ke Seluruh Negara Pada 2014**  
**Bernama**  
**17 Julai, 2012**

KUALA LUMPUR, 17 Julai (Bernama) -- Kerajaan bercadang memperluaskan pelaksanaan Program Penggunaan Bahan Api B5 ke seluruh negara secara berperingkat termasuk sektor tidak bersubsidi selewat-lewatnya pada 2014.

Timbalan Menteri Perusahaan Perladangan dan Komoditi Datuk Hamzah Zainuddin memberitahu persidangan Dewan Negara pada Selasa, kerajaan telah melaksanakan sepenuhnya program itu di Wilayah Tengah meliputi Putrajaya, Melaka, Negeri Sembilan, Kuala Lumpur dan Selangor pada 1 Nov tahun lepas.

"Sejak 15 Feb lepas, kerajaan juga memperluaskan program ini ke sektor bersubsidi di Wilayah Tengah dalam bidang perikanan, 'skid tank', 'fleet card' serta pengangkutan air," katanya.

Hamzah berkata demikian semasa menjawab soalan Datuk Boon Som Inong yang meminta penjelasan kemajuan Program Penggunaan Bahan Api B5 serta sejauh mana penggunaannya memberi kesan kepada alam sekitar.

Beliau berkata bekalan bahan api baharu, biodiesel atau B5 merupakan adunan lima peratus biobahan api sawit dengan 95 peratus diesel petroleum yang mesra alam serta mampu mengurangkan pelepasan gas rumah hijau berbanding diesel fosil.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=681167>

